



*Kamis, 11 Agustus 2022*  
**Ogen: Kuan-kuanen 4:10-17**



**Tolak janah sirangi si jahat**



**A**di ngerana kita kerna anak remaja, tentuna ngerana kita kerna kebiasaan ras permasalahenna. Usia remaja rusur si kataken usia si paksana ndarami jati diri erkiteken i je masa peralihen. Masa anak-anak enggo ibentasinna, masa dewasa lenga ka seh. Megati anak remaja e salah i bas muat keputusan ras perbahanenna pe megati lenga payo. Selaku nande perlu kal si perdiatoken masalah si lit i bas anakta tupung ia remaja. Si pemena masalah perkembangan fisik, i bas kulana mulai turah jerawat erkiteken reaksi hormon, seh maka turah la percaya diri. Sipeduaken gangguan psikis, kurang iperdiatoken keluarga, jabu la harmonis, faktor lingkungan, pernah ibuli, ras sidebanna. Si enda banci erbahan anak e menyendiri, pangen akapna si sada asangken keteremen. Piah mesunah ia bengket ku bas pinakit sosial umpamana narkoba, minem mabuk, free sex ras sidebanna. Sipelueluken penandaina kerna Dibata kurang erkiteken labo lit si mabaisa. Dungna la akapna meherga bana, icedaina dirina ras la lit pengarapenna ku wari-wari si reh. Perlu kal kepe si perdiatoken kecibal anak-anakta hususna i bas masa remajana.

Salomo tuhu-tuhu emperdiatoken anak si nguda. Janah la ia lupa mereken pengajaren, e me kerna kepentaren ras kegeluhen si payo. Pentar e me meteh sura-sura Dibata, si pemena: nggeluh bujur ras adil. Lit i bas kebenaran, tutus atena dingan jujur i bas ndahiken dahinna. Peduaken: kegeluhenna encidahken moral si mehuli, mehamat man kalak si tuan asangken ia, mesayang man sebayana ras agi-agina. Keleng atena kulana. Nina Salomo, *ula kam lawes kempak perlawes kalak jahat. Perbahanenna pe ula usih. Tulak janah sirangilah si jahat, ula nilah tapi pinterkenlah perdalannu.* Pengajaren Salomo e min pengajarenta man anak-anakta.